

UDHËZIM
Nr. 20, datë 6.8.2014

PËR ZHVILLIMIN E KONKURSEVE TË PRANIMIT DHE TARIFËN E REGJISTRIMIT PËR KONKURRIM NË DISA PROGRAME STUDIMI TË CIKLIT TË PARË ME KOHË TË PLOTË, NË INSTITUCIONET PUBLIKE TË ARSIMIT TË LARTË, PËR VITIN AKADEMIK 2014-2015

Mbështetur në nenin 102, të Kushtetutës së Republikës së Shqipërisë, në nenet 33 dhe 75, të ligjit nr. 9741, datë 21.5.2007, “Për arsimin e lartë në Republikën e Shqipërisë”, i ndryshuar, vendimi nr. 517, datë 1.8.2014, të Këshillit të Ministrave, “Për kuotat e pranimi në institucionet publike të arsimit të lartë, cikli i parë i studimeve me kohë të plotë, programet e studimeve jouniversitare profesionale dhe në programet e integruara të studimeve të ciklit të dytë, si edhe tarifat e shkollimit për vitin akademik 2014-2015”, si dhe në zbatim të vendimit të Këshillit të Ministrave nr. 78, datë 8.2.2006, “Për krijimin e maturës shtetërore dhe pranimet në shkollat e larta publike”, i ndryshuar

UDHËZOJ:

1. Pranimet në programet e ciklit të parë të studimeve me kohë të plotë dhe në programet e integruara të studimeve të ciklit të dytë, për vitin akademik 2014-2015, në:

1.1 Universitetin e Arteve të Tiranës (të gjitha programet e studimit të ciklit të parë me kohë të plotë);

1.2 Universitetin e Sporteve të Tiranës (të gjitha programet e studimit të ciklit të parë me kohë të plotë);

1.3 Universitetin “Luigj Gurakuqi” Shkodër (programi i studimit të ciklit të parë me kohë të plotë “Edukim Fizik dhe Sporte”);

1.4 Universitetin “Aleksandër Xhuvani” Elbasan (programi i studimit të ciklit të parë me kohë të plotë “Edukim fizik dhe sporte”);

1.5 Universitetin “Aleksandër Moisiu” Durrës (programet e studimit të ciklit të parë me kohë të plotë, të Fakultetit të Studimeve të Integruara me Praktikën - FASTIP);

a) Menaxhim i bankave (program në gjuhën angleze);

b) Menaxhim i ndërmarrjeve të vogla dhe të mesme (program në gjuhën angleze) të bëhen mbi bazën e rezultateve të Maturës Shtetërore dhe të rezultateve të fituara nga konkursi i pranimi, i organizuar nga këto institucione publike të arsimit të lartë.

2. Në Universitetin e Arteve të Tiranës rezultatet e shkollës së mesme (nota mesatare e viteve të shkollimit dhe gjithë provimet e Maturës Shtetërore) të llogariten në masën 30% dhe rezultatet e konkursit të pranimi në masën 70%, sipas tabelës nr. 1, bashkëngjitur këtij udhëzimi. Kandidati që nuk kalon prapun e pikëve minimale të konkursit të pranimi, në programin ku ka konkurruar, sipas tabelës nr. 2, bashkëlidhur këtij udhëzimi, sipas përcaktimit për program studimi, nuk fiton të drejtën e studimit.

3. Në Universitetin e Sporteve të Tiranës rezultatet e shkollës së mesme (nota mesatare e viteve të shkollimit dhe gjithë provimet e Maturës Shtetërore), të llogariten në masën 50%, kurse rezultatet e konkursit të pranimi në masën 50%, sipas tabelës nr. 1 bashkëlidhur këtij udhëzimi.

4. Në Universitetin “Luigj Gurakuqi” Shkodër dhe Universitetin “Aleksandër Xhuvani” Elbasan, në programin e studimit “Edukim fizik dhe sporte”, rezultatet e shkollës së mesme (nota mesatare e viteve të shkollimit dhe gjithë provimet e Maturës Shtetërore) të llogariten në masën 50%, kurse rezultatet e konkursit të pranimi në masën 50%, sipas tabelës nr. 1, bashkëngjitur këtij udhëzimi.

5. Në programet e studimit të FASTIP të Universitetit “Aleksandër Moisiu”, Durrës, rezultatet e shkollës së mesme (nota mesatare e viteve të shkollimit dhe e të gjithë provimeve të Maturës Shtetërore), të llogariten në masën 40%, kurse rezultate e konkursit të pranimi (Gjuha Angleze dhe intervista e punësimit) në masën 60%, sipas tabelës nr. 1 bashkëngjitur këtij udhëzimi. Kandidati që nuk kalon prapun e pikëve minimale të konkursit të pranimi, në programin ku ka konkurruar, sipas tabelës nr. 2, bashkëlidhur këtij udhëzimi, sipas përcaktimit për program studimi, nuk fiton të drejtën e studimit.

6. Për të gjitha programet e studimit, sipas pikës 1, të këtij udhëzimi, pikët minimale dhe maksimale të konkurseve përcaktohen në tabelën nr. 2, bashkëngjitur këtij udhëzimi.

7. Rregulloret dhe programet e konkurseve të miratuara nga IAL-të përkatëse, të bëhen publike, duke filluar nga data 5 gusht 2014.

8. Kandidatët që kanë përzgjedhur gjatë aplikimit me formularin A2, programet e studimit sipas pikës 1 të këtij udhëzimi, kandidatët që përfitojnë nga kuotat e akorduar për shqiptarët jashtë kufijve të vendit, të verbrit, romët dhe ballkano-egjiptianët, invalidët paraplegjikë e tetraplegjikë, jetimët, shtetasit e huaj, si dhe kandidatët

që aplikojnë për program të dytë studimi apo transferim studimesh, që do të marrin pjesë në konkurset e pranimit për këto programe studimi, të regjistrohen për zhvillimin e konkursit pranë sekretarive mësimore të fakultetit përkatës. Periudha e regjistrimit të jetë nga data 21 gusht deri në orën 12:00 të datës 28 gusht 2014.

9. Agjencia Kombëtare e Provimeve AKP, deri në datën 19 gusht 2014, të përgatisë listën e konkurrentëve për konkurset e pranimit në programet e studimit sipas pikës 1 të këtij udhëzimi, sipas preferencave të kërkuara prej tyre në formularin A2.

10. Lista e konkurrentëve për secilin konkurs pranimi të pikës 1 për të gjithë kandidatët që kanë plotësuar formularin 2, t'u dorëzohen nga AKP-ja institucioneve publike të arsimit të lartë, sipas programeve të studimit, në formë të shkruar dhe elektronike, brenda orës 12:00 të datës 20 gusht 2014. Së bashku me listat e konkurrentëve dërgohen pranë IAL-ve publike dhe udhëzimet teknike për hedhjen e pikëve të konkurseve në sistemin e maturës shtetërore *online*, si dhe username dhe passwordet e sekretarive të fakulteteve.

Kandidatët që përfitojnë nga kuotat e akorduara për shqiptarët jashtë kufijve të vendit, të verbrit, romët dhe ballkano-egjiptianët, invalidët paraplegjikë dhe tetraplegjikë, jetimët shtetasit e huaj si dhe kandidatët që aplikojnë për program të dytë studimi apo transferim studimesh, që do të marrin pjesë në konkurset e pranimit për këto programe studimi, aplikojnë drejtpërdrejt në institucionet përkatëse të arsimit të lartë publik.

11. Rektoratet dhe dekanatet e IAL-ve publike të shpallin në mjedise të dukshme të institucioneve të tyre deri në datën 8 gusht 2014 datat dhe oraret e veprimeve të regjistrimit, procedurat përkatëse, listën e dokumenteve të nevojshme për të siguruar një ecuri normale të procesit të regjistrimeve në konkursin e pranimit të ciklit të parë të studimeve me kohë të plotë.

12. Sekretaritë mësimore të fakulteteve përkatëse, të programeve të studimit të pikës 1, pas verifikimit të listave të të regjistruarve, me listën e dorëzuar nga AKP, në datën 29 gusht 2014, ora 12:00, të shpallin listat e konkurrentëve të regjistruar dhe t'i afishojnë ato në vende të dukshme, në mjediset e fakulteteve të tyre.

13. Datat e konkursit të pranimit në këto institucione publike të arsimit të lartë, të jenë sipas këtij kalendari:

13.1 Universiteti i Arteve, Tiranë në periudhën 1 shtator - 5 shtator 2014

13.2 Universiteti i Sporteve të Tiranës në periudhën 1 shtator - 4 shtator 2014

13.3 Universiteti "Luigj Gurakuqi" Shkodër për programin e studimit:

a) Edukim fizik dhe sporte 2 shtator - 5 shtator 2014

13.4 Universiteti "Aleksandër Xhuvani", Elbasan për programin e studimit

a) Edukim fizik dhe sporte 2 shtator-5 shtator 2014

13.5 Universiteti "A. Moisiu" Durrës, për të gjitha programet e studimit të përcaktuara në pikën 1.5 të këtij udhëzimi: 1 shtator - 3 shtator 2014.

14. Tarifat e regjistrimit të kandidatëve pjesëmarrës në konkurset e pranimit në këto institucione publike të arsimit të lartë, të jenë si më poshtë:

i) Në të gjitha programet e studimit në Universitetin e Sporteve të Tiranës 5000 (pesë mijë) lekë;

ii) Në të gjitha programet e studimit në Universitetin e Arteve, Tiranë 5000 (pesë mijë) lekë;

iii) Në programet e studimit në Universitetin "Luigj Gurakuqi" Shkodër "Edukim fizik dhe sporte" 5000 (pesë mijë) lekë;

iv) Në programin e studimit "Edukim Fizik dhe Sporte" në Universitetin "Aleksandër Xhuvani" Elbasan 5000 (pesë mijë) lekë.

15. Të gjitha tarifat e regjistrimit për konkurrim në programet e ndryshme të studimit të ciklit të parë me kohë të plotë të arkëtohen nëpërmjet sistemit bankar ose zyrave të postës shqiptare, për llogari të IAL-së publike përkatëse.

16. Konkurset e pranimit në këto institucione publike të arsimit të lartë të monitorohen nga përfaqësues të MAS.

17. Rezultatet e konkurseve të pranimit hidhen në portalin e Maturës Shtetërore *online* nga sekretaritë e fakulteteve sipas procedurave të udhëzimit teknik të dërguar nga AKP-ja. Më pas ato dërgohen në MAS e në AKP. Në formë shkresore dhe elektronike (në CD), brenda 3 ditëve nga përfundimi i tyre.

18. Për zbatimin e këtij udhëzimi ngarkohen Drejtoria e Arsimit të Lartë dhe Shkencës, Agjencia Kombëtare e Provimeve (AKP) dhe institucionet publike përkatëse të Arsimit të lartë.

Ky udhëzim hyn në fuqi menjëherë dhe publikohet në Fletoren Zyrtare.

MINISTRI I ARSIMIT DHE SPORTIT
Lindita Nikolla